

# CIVILNO DRUŠTVO U AKCIJI ZA DIJALOG I PARTNERSTVO

## O projektu

Volume 1, Issue 1, Dec 2011

Vodeći partner projekta je Asocijacija agencija lokalne demokratije (ALDA), dok su ostali partneri članovi ALDA mreže iz Bosne i Hercegovine, Hrvatske i Srbije – Agencije lokalne demokratije Mostar, Zavidovići, Osijek i Subotica, kao i Forum građana Tuzle, Centar za lokalni razvoj Breza, DON Prijedor i Nove nade Bihać, lokalne nevladine organizacije koje učinkovito doprinose lokalnom demokratskom razvoju i implementaciji općinskih ugovora o suradnji. Svrha projekta je da promoviše demokratsku ulogu nevladinih organizacija u podsticanju učešća građana u javnom i političkom životu na lokalnom nivou putem usvajanja i primjene Sporazuma o saradnji javnog i civilnog sektora. Više o projektu možete saznati [ovdje](#).



## Konferencijom u Tuzli “lansiran” projekat



Jasmin Imamović,  
načelnik Općine Tuzla

U okviru projekta “Civilno društvo u akciji za dijalog i partnerstvo”, u Tuzli je od 6. do 8. oktobra 2011. godine održana početna konferencija projekta pod nazivom “**Sporazumi o saradnji na lokalnom nivou: Izazovi i perspektive demokratskog učešća na lokalnim nivoima u Bosni i Hercegovini**”. Osnovni cilj konferencije je bio da se kroz strukturiran dijalog o implemantaciji sporazuma o saradnji na lokalnom nivou između organizacija civilnog društva i lokalnih vlasti, sagledaju i analiziraju izazovi i perspektive demokratskog učešća na lokalnim nivoima u Bosni i Hercegovini. I pored toga što se jedan broj predstavnika viših nivoa vlasti nije odazvao, konferencija je polučila odlične rezultate. U dva dana rada su se mogle čuti izvanredne analize, koje su prepoznate od učesnika kao vrlo realne, samokritične, poticajne. Primjeri iz Srbije i Hrvatske, predloženi od strane izvrsnih uvodničara, poslužiti će akterima nevladinih organizacija, kako onih koji su bili prisutni, tako i širem krugu, putem web-a, newslettera i drugim vidovima IT komunikacija, kao jako dobar primjer kako se ponašati, kakve stavove zauzeti, kakve strateške planove napraviti u slijedećem periodu i koje greške ispraviti ili bar pokušati ispraviti. Takođe, predstavnici vlasti iz lokalnih zajednica koji su se odazvali pozivu, su imali priliku da čuju i prihvate neka pozitivna iskustva iz rada drugih lokalnih zajednica u susjednim državama i da iz toga izvuku značajne benefite. Više o konferenciji možete saznati [ovdje](#).

## Sporazum o saradnji između lokalnih vlasti i nevladinih organizacija

Sporazum između lokalnih vlasti i nevladinih organizacija (u daljem tekstu »strane potpisnice«) koje djeluju na području općine predstavlja njihovo opredjeljenje da se, dugo vremena podržavani rad i razvoj nevladinog sektora na ovoj teritoriji, uredi ovim aktom u cilju da se, na osnovama zajedničkih vrijednosti koje ostvaruje nevladin i javni sektor, uspostave jasne, efikasne i transparentne procedure međusobne saradnje i partnerstva. Strane potpisnice ovog sporazuma su saglasne da se u međusobnoj saradnji pridržavaju zajedničkih vrijednosti i građanskih inicijativa koje proizlaze iz *Evropske povelje o lokalnoj samoupravi*, Ustava BiH, Ustava entiteta, Ustava kantona, Zakona o lokalnoj samoupravi Federacije BiH i Republike Srpske, Zakona o lokalnoj samoupravi kantona i Statuta općine, koje su temelj i okvir za prava građana da se slobodno i bez ograničenja međusobno udružuju, u izgradnji demokratskog društva zasnovanog na: učešću građana u odlučivanju; individualnoj slobodi i odgovornosti; saradnji lokalnih vlasti i građana, građanskoj solidarnosti, toleranciji i uvažavanju različitosti; socijalnoj pravdi; ličnom integritetu; uvažavanju različitih formi institucionalnog djelovanja; transparentnosti i trajnoj usmjerenosti ka stvaranju djelotvornih normativa koji će unaprijediti odnose između općinskih vlasti i nevladinih organizacija. Do sada je ovaj Sporazum potpisan u 68 opština Bosne i Hercegovine. O stanju Sporazuma na terenu izvještavaju partnerske organizacije u projektu “Civilno društvo u akciji za dijalog i partnerstvo”. Više o stanju sporazuma na terenu možete pročitati [ovdje](#).



## BIHAĆ

Bez obzira što su u procesu izrade sporazuma koji je trajao skoro godinu dana, po uzoru na druge demokratske prakse, učestvovali su i predstavnici nevladinog sektora i aktuelne vlasti i što cilj potpisivanja ovog sporazuma nije u usvajanju još jednog u nizu dokumenata, već u definisanju principa pozitivne saradnje između građana, nevladinih organizacija i vlasti u želji da se postojeći kapaciteti objedine na rješavanju brojnih problema građana Sporazum nije potpisan u Bihaću sa općinskim vlastima. Po informacijama dostupnim u neformalnim krugovima uglavnom iz NVO sektora došlo je do raskola među njegovim članicama te se sporazum pored svih napora uloženi od strane Centra za promociju civilnog društva nije potpisao ni u općini Bihać niti na nivou Kantona niti u drugim općinama Kantona.



## BREZA

Centar za lokalni razvoj je dobio pismo podrške od strane načelnika tj. Općine Breza u vezi sa realizacijom partnerskog projekta „Civilno društvo u akciji za partnerstvo i dijalog“. Pismom podrške Općina Breza pokazuje dobru volju za suradnju u implementaciji navedenog projekta te pokazuje spremnost direktnog učešća predstavnika lokalne vlasti u aktivnostima.

Što se tiče stanja na terenu, Općina Breza u proteklih nekoliko godina pokazuje interesovanje za aktivnosti lokalnih nevladinih organizacija, a možemo slobodno reći da to nije bila praksa prije nekih šest godina. Naime, uz minimalnu finansijsku podršku, lokalne vlasti svojim odzivom i prisustvom na gotovo svim manifestacijama, konferencijama, debatama koje organizuju nevladine organizacije kroz svoje projekte pokazuje da uveliko uvažava rad istih.

## MOSTAR

Što se tice Sporazuma o suradnji između lokalnih vlasti i organizacija civilnog društva na području Grada Mostara, cijela priča počela je još 2006. godine, kada je skupina nevladinih organizacija, okupljenih oko zajedničkog cilja, poboljšanja komunikacije i suradnje sa lokalnim vlastima, oformilo neformalnu mrežu Mostarska platforma. Na sastancima Mostarske platforme donesen je osnovni kostur, a zatim izrađen i cijeli dokument Sporazuma o suradnji, u decembru 2008. godine. Dokument je kao takav doživio još par revidiranja, izmjena i dopuna od strane odgovornih osoba uposlenih u Gradskoj upravi Grada Mostara, Odjela za pitanja mladih, kulturu i sport.

Tek je u februaru 2011. Sporazum o razumijevanju između lokalnih vlasti i nevladinih organizacija u gradu Mostaru predat Gradskom vijeću Grada Mostara, na usvajanje, kao pravovazeći i podoban.

Zvanično usvajanje dokumenta od strane Gradskog vijeća, kao zakonodavne vlasti u Gradu Mostaru, još uvijek se čeka.

## PRIJEDOR

Počeci nastajanja i rada organizacija civilnog društva u Prijedoru vezani su za period nakon 1996. godine i otežane okolnosti i sankcije EU i SAD kroz Lautenbergov amandman (po osnovu Zakona o stranim intervencijama Američkog kongresa Prijedoru, 1998.god.). Sankcije su za posljedicu imale izolaciju i samoizolaciju Prijedora, a samim tim i nepovoljne uslove za razvoj civilnog društva i NVO sektora u cjelini.

Ukidanjem sankcija u septembru 1998.god od strane EU i SAD-a u maju 2002.god., stvoreni su preduslovi za pojačano djelovanje organizacija civilnog društva.

Otvaranje Prijedora prema okruženju krenulo je u periodu 1998-1999.god. i dovelo do veće dostupnosti međunarodnih donatorskih sredstava i jačanja NVO sektora. U periodu 1998-2004, registruje se napredak u organizovanju građana i osnivanju čak 174 organizacije civilnog društva.

Povoljna klima u razvoju građanskog društva 2006. god. rezultira usvajanjem Odluke o kriterijumima, načinu i postupku raspodjele sredstava Udruženjima i Fondacijama, kroz proces koji je započelo Udruženje "DON" u saradnji sa organizacijama sa područja opštine Prijedor (Sl.glasnik 03-06), Ključ, Kozarska Dubica, Sanski Most i Kostajnica. Period 2006-2008 karakteriše i to, da smo jedna od prvih opština koja prema sistematizaciji radnih mjesta uvodi i mjesto – Saradnik sa nevladinim organizacijama, u sklopu Odjeljenja privrede i društvenih djelatnosti, a od 2008. god. formira se Odjeljenje za društvene djelatnosti – a efekti saradnje su vidljivi kroz direktnu komunikaciju i koordinaciju NVO-a sa vladinim organizacijama. Opštinu Prijedor, karakteriše posebna pažnja i podrška nacionalnim manjinama, te omladinskom organizovanju u ruralnim sredinama. Kongres lokalnih i regionalnih vlasti u okviru Savjeta Evrope je u Strasbourgu 7.3.2009. dodjelio je prestižnu nagradu "DOSTA", opštinama koje su se tokom 2008. posebno posvetile integraciji Roma. Prvo mjesto je dobila Opština Prijedor. Kao izraz dobre političke volje i sveukupne politike i dobre uprave, Opština Prijedor pokazuje i kroz potpisivanje Sporazuma o saradnji NVO sektora i Opštine Prijedor, potpisanog 2009.god., kao još jedan dokument koji definiše saradnju unutar dva sektora. Primjena Sporazuma u dosadašnjem periodu vidljiva je kroz transparentan način dodjele sredstava iz budžeta namjenjenim za organizacije civilnog društva putem javnog konkursa, a u narednom periodu dosljedna primjena Sporazuma trebala bi da bude kroz kreiranje akcionog plana saradnje i učešće organizacija civilnog društva u kreiranju javnih politika.

[Sljedeća strana](#)



## TUZLA

Iako Sporazum između lokalnih vlasti i nevladinih organizacija u Tuzli nije zvanično potpisan, Općina Tuzla ima razvijene procedure za pružanje podrške radu nevladinim organizacijama.

U skladu sa članom 6. Pravilnika o kriterijima i postupku dodjele sredstava za sufinansiranje programa/projekata udruženja i fondacija iz oblasti društvenih djelatnosti na području općine Tuzla, nadležna Služba za razvoj, poduzetništvo i društvene djelatnosti Općine Tuzla jednom godišnje raspisuje javni poziv za sufinansiranje programa/projekata udruženja i fondacija iz oblasti društvenih djelatnosti na području općine Tuzla.

Pravo učešća na javnom pozivu imaju udruženja i fondacije sa sjedištem na području općine Tuzla čije su programske/projektne aktivnosti usmjerene na razvoj u oblasti društvenih djelatnosti. Na javni poziv se mogu javiti i udruženja i fondacije sa sjedištem izvan općine Tuzla, a koje su registrovane na području Bosne i Hercegovine ako realiziraju projekte i programe od interesa za općinu Tuzla, što se procjenjuje u svakom konkretnom slučaju.

Pravo na korištenje sredstava mogu ostvariti udruženja i fondacije koje imaju odgovarajući stručni kadar za realizaciju predloženih programa i projekata, a koji se odnose na: muzejsko-galerijske i likovne djelatnosti; pozorišne djelatnosti; izdavačke djelatnosti i promocije (knjiga, muzičkih djela, kataloga, fotografija, časopisa i novina u kulturi); filmske i multimedijske djelatnosti; poticanje i razvoj kulturno-umjetničkog amaterizma; muzičke i muzičko-scenske djelatnosti; akcije i manifestacije na području pozorišne, muzičko-scenske, muzičke i plesne djelatnosti; međunarodnu i međugradsku kulturnu saradnju; promociju mladih u kulturi i alternativnu/urbanu kulturu; afirmaciju kulture i tradicije Tuzle; razvoj kreativne industrije u Tuzli; očuvanje kulturno-istorijskog i prirodnog naslijeđa; ostale programe/projekte u kulturi; zaštitu i promociju ljudskih prava i prava djeteta; socijalnu zaštitu, zaštitu civilnih žrtava rata, zaštitu porodica sa djecom i smanjenje nezaposlenosti; podršku mladima i djeci; edukaciju mladih (borba protiv poroka u društvu, sprečavanje nasilja, maloljetničke delikvencije i sl.); demokratizaciju i razvoj civilnog društva; unapređenje kvaliteta življenja, zaštitu i očuvanje zdravlja i životne sredine; zaštitu i očuvanje kulturne baštine naroda i nacionalnih manjina u Bosni i Hercegovini i promociju njihovih kulturnih aktivnosti; promociju volonterskog i humanitarnog rada i lokalnih građanskih inicijativa; provođenje pomoći i samopomoći, poticanje integracije djece sa teškoćama u razvoju i osoba sa invaliditetom, sadržaje usmjerene na poticanje samostalnog življenja, edukaciju osoba sa invaliditetom, članova porodica i svih drugih sudionika sistema zaštite i ostvarivanju prava osoba sa invaliditetom; unapređivanje kvaliteta života djece sa teškoćama u razvoju i osoba sa invaliditetom.

Opravdanost i prihvatljivost za sufinansiranje programa /projekata udruženja i fondacija cijeni se na osnovu slijedećih kriterija: značaj programa odnosno projekta i njegovog doprinosa u razvoju oblasti društvenih djelatnosti na području općine Tuzla; obezbijeđenog sufinansiranja projekta odnosno programa iz sopstvenih i iz drugih izvora (domaćih i međunarodnih); obezbijeđena ekonomičnost projekta; ostvareni dosadašnji rezultati Korisnika na unapređenju razvoja oblasti društvenih djelatnosti.



## ZAVIDOVIĆI

Sporazum između Općinskog vijeća, Općinskog načelnika i nevladinih organizacija (udruženja građana) koje djeluju na području općine Zavidovići predstavlja njihovo opredjeljenje da se dugo vremena podržavani rad i razvoj nevladinog sektora na ovoj teritoriji, uredi ovim aktom u cilju da se na osnovama zajedničkih vrijednosti koje ostvaruje nevladin i javni sektor, uspostave jasne, efikasne i transparentne procedure međusobne saradnje i partnerstva.

Strane potpisnice ovog sporazuma su saglasne da se u međusobnoj saradnji pridržavaju zajedničkih vrijednosti i građanskih inicijativa koje proizlaze iz Evropske povelje o lokalnoj samoupravi, Ustava BiH, Ustava Federacije BiH, Ustava Zeničko-dobojskog kantona, Zakona o principima lokalne samouprave Federacije BiH, Zakona o lokalnoj samoupravi Zeničko-dobojskog kantona i Statuta Općine Zavidovići, koji su temelj i okvir za prava građana da se slobodno i bez ograničenja međusobno udružuju u izgradnji demokratskog društva.



Predsjednik ALD sa volonterima Ceker-a



Načelnik sa dobitnicima sredstava Omladinske banke

Općinsko vijeće i Općinski načelnik, svjesni svojih obaveza i odgovornosti prihvataju nevladine organizacije kao partnera u zadovoljavanju javnih potreba i interesa građana općine Zavidovići, te su spremni da dio specifičnih poslova kada se za to iskaže potreba kroz jasno utvrđen javni interes, povjere nevladinim organizacijama, djelimično ili u cjelini.

Nevladine organizacije prihvataju da preuzmu dio poslova od javnog interesa za građane općine Zavidovići i da iste izvršavaju savjesno i javno u skladu sa preuzetim obavezama prema davaocu sredstava i prema korisnicima usluga. One su obavezne da se, u saradnji sa lokalnim vlastima, pridržavaju „Kodeksa ponašanja za nevladin sektor BiH“.

Sporazum između Općinskog vijeća, Općinskog Načelnika i nevladinih/neprofitnih organizacija općine Zavidovići objavljen je 2007. godine. (Sl. glasnik Općine Zavidovići br. 7/2007).

Na području Zavidovića djeluje preko 60 organizacija registrovanih prema Zakonu o udruženjima i fondacijama i pokrivaju različite sektore društvenog djelovanja uključujući oblasti zaštite okoliša, kulture, sporta, povratka i ljudskih prava, omladinske, socijalne kategorije, poljoprivrede i dr.

Na inicijativu nekoliko organizacija civilnog društva u decembru 2008. godine formira se „Afirmativna radna grupa za kulturne djelatnosti i rad sa mladima“, radna grupa sastavljena od predstavnika više udruženja.

U martu 2009. godine, 15 organizacija čije su programske aktivnosti vezane za sektor kulture i rada sa mladima potpisuje protokol o saradnji s ciljem podizanja svijesti građana o značaju njegovanja kulturnih vrijednosti i promovisanja ideja zdravog života mladih; obezbjeđivanja kvalitetnijeg rada i promocije nevladinih organizacija i udruženja građana općine Zavidovići koja rade na omladinskim projektima i u oblasti kulture; većeg angažovanja i uloge nevladinih organizacija u implementaciji „Sporazuma između Općinskog vijeća, Općinskog Načelnika i nevladinih/neprofitnih organizacija općine Zavidovići“; praktikanja aktivnosti iz „Strategije partnerstva Općine Zavidovići sa građanima“; usmjeravanja aktivnosti prema zajedničkim društveno-korisnim trendovima te značajnijeg uključivanja u procese donošenja odluka.



# Konferencija

## Sporazumi o saradnji na lokalnom nivou: Izazovi i perspektive demokratskog učešća na lokalnim nivoima u Bosni i Hercegovini



Ova dvodnevna konferencija osmišljena je kao početni događaj namijenjen predstavljanju aktivnosti predviđenih projektom regionalne suradnje: Civilno društvo u akciji za dijalog i partnerstvo, koji je financiran od strane Delegacije Evropske unije u Bosni i Hercegovini, sredstvima obezbijeđenim iz programa „Podrška mrežama organizacija civilnog društva“.

U ovom broju newsletter-a predstavljamo vam zaključke sa konferencije:

1. Sporazum o saradnji organizacija civilnog društva i vlasti na svim nivoima je nova demokratska vrijednost u bh društvu, koju mnogi još uvijek ne prepoznaju i ne koriste na odgovarajući način.

2. Iako je Sporazum potpisan u većem broju opština (lokalni nivo, oko 70 opština), on se ne provodi suštinski.

3. Nedovoljna je saradnja između nevladinih organizacija i predstavnika lokalnih vlasti na projektima koji bi obezbjedili sredstva za razvoj lokalne zajednice, to se naročito odnosi na sredstva Evropske unije i IPA fondove. Predstavnici lokalne vlasti ne prepoznaju ulogu nevladinih organizacija u tom procesu.

4. Iako je u većini slučajeva raspodjela lokalnih fondova transparentna, većina sredstava odlazi na podršku organizacijama koje nemaju razvijenu strategiju razvoja i opstanka (sportska udruženje i sl.).

5. Organizacije civilnog društva u BiH nisu okupljene oko određenih ciljeva, vrlo često su suprotstavljene jedni drugima iako bi korist zajedničkog djelovanja bila daleko veća. Različite mreže često obavljaju aktivnosti iste vrste sa vrlo sličnim ciljevima, a da jedni ne znaju za druge.



6. U BiH, kao i u susjednim državama, postoji mnogo registrovanih nevladinih organizacija, mreža nvo-a, ali je malo onih koji mogu da se pohvale političkim angažmanom, jasnim i čvrstim, korektnim ponašanjem.

7. Organizacije civilnog društva se često ponašaju ekskluzivistički, samozadovoljno vode diskusije između sebe, ne ulaze i ne žele dijalog sa onim političkim faktorima koje stalno kritikuju.



8. Kada je u pitanju status nevladinih organizacija i njihova uloga u demokratskim procesima, posebno kada je riječ o evropskim integracijama, onda se može reći da je situacija u susjednim državama različita. Najdalje je otišla Hrvatska, gdje su se nevladine organizacije nametnule lokalnim vlastima, svojom sposobnošću i obučenošću da uspostave kontakt, apliciraju i dobiju sredstva od Evropske unije za lokalni razvoj po projektima. Naravno i lokalni političari su shvatili da sami to ne mogu učiniti, pa se išlo za obostranom koristi. Najudaljenija od tog procesa je nažalost Bosna i Hercegovina, opterećena specifičnim etno-konfesionalnim uređenjem.

9. BiH društvo je još uvijek nezrelo za promjene te bi odlučujuću ulogu trebala da ima međunarodna zajednica.

10. Sve je manje mladih ljudi u civilnom društvu. Oni su jednostavno, kao ugrožena kategorija, praktični i idu za poslom. Nevladin sektor im kratkoročno ne nudi ništa osim aktivizma, rada, možda obećanja da će nešto biti finansirano a dugoročni benefit kao što je iskustvo, savremeno obrazovanje koje ide ukorak sa evropskim normama se poništava sa kratkoročnim uslugama koje im pružaju političke partije.

11. I pored svega navedenog, svi su mišljenja da je od strane organizacija civilnog društva, i pored svih postojećih prepreka, učinjeno mnogo, jako mnogo. Pozitivni koraci se ipak dešavaju, nevladin sektor ima svoju budućnost. Nije lako izaći iz kolektivističke svijesti koja je naslijeđe, i u tom smislu ono što su nvo-i postigli u BiH, pa i u susjednim državama, posebno na lokalnom nivou, se ne može zanemariti niti minimizirati. Civilni sektor je stvar sadašnjosti, ne opada broj sponozora, on se samo restruktuiru, hvata korak sa promjenama koje se dešavaju i na zapadu. Rad u lokalnoj sredini, sa običnim ljudima, sa lokalnim političarima je jako važan i ako organizacije civilnog društva imaju šta da ponude, neka dobra rješenja a sigurno je da imaju, onda ima šanse da zaista bude katalizator demokratskih promjena u društvu.





## Civil Society In Action For Dialogue And Partnerships

### Glavni ciljevi dvogodišnjeg projekta su:

- Podrška unapređenju organizacijskih i upravljačkih kapaciteta nevladinih organizacija koje su uključene u promociju demokratskog upravljanja na lokalnom nivou;
- Podrška lokalnim inicijativama koje promovišu demokratske potencijale organizacija civilnog društva i njihovu ulogu u dobrom lokalnom upravljanju;
- Podsticaj umrežavanju sektorskih nevladinih organizacija na lokalnom i regionalnom nivou u Bosni i Hercegovini;
- Unapređenje informisanosti i jačanju svijesti javnosti o evropskim standardima dobrog upravljanja i učešća građana u odlučivanju;
- Podsticaj unapređenju međusektorske saradnje organizacija civilnog društva i lokalnih vlasti u Bosni i Hercegovini kao i umrežavanju sa partnerima u drugim IPA zemljama i zemljama članicama Evropske unije.

**Glavne aktivnosti projekta** su grupisane u sljedeće komponente:

- **Akcije podizanja svijesti:** sadrže tematsku konferenciju u Tuzli na početku projekta; organizovanje lokalnih kampanja podizanja svijesti je podrška efikasnoj implementaciji sporazuma o saradnji na opštinskom nivou u Tuzli, Mostaru, Bihaću, Brezi, Zavidovićima i Prijedoru; serije internet i medijskih kampanja; lokalne javne debate; štampanje promotivnog materijala projekta; elektronski bilten, Priručnik o dobrim praksama, štampanje šest NVO adresara, završna konferencija i NVO sajam u Mostaru.
- **Komponenta izgradnje kapaciteta** uključuje četiri dvodnevna trening seminara za lokalne NVO-e i lokalne vlasti na teme strateškog planiranja, upravljanja projektnim ciklusom, vještina zagovaranja, komunikacije i odnosa sa javnosti.
- **Razmjena dobrih lokalnih praksi** uključuje četiri dokumentarna filma: zona dobrog lokalnog upravljanja u implementaciji lokalnih sporazuma o saradnji i promociji NVO-a koji zagovaraju razvoj demokratije na lokalnom nivou; jednu studijsku posjetu kolega iz EU, te okrugli sto sa lokalnim zainteresiranim stranama u Bosni i Hercegovini o dobrom upravljanju i učešću građana u donošenju odluka i izradi politika; regionalno umrežavanje i izgradnja partnerstva koje će povezati OCD i vlasti.

### Sektorsko umrežavanje i izgradnja partnerstva

imaju za cilj da pomognu ojačati ulogu civilnog društva u konsolidaciji participativne demokratije na lokalnom nivou, što je suština ovog projekta. Osnovne aktivnosti civilnog društva uključuju izgradnju kapaciteta, kampanje informisanja i zagovaranja, razvoj komunikacijskih alata kao i razmjena dobrih praksi lokalnog pristupa između opština u Bosni i Hercegovini, ali i kroz interakciju sa susjednim IPA zemljama i zemljama članicama EU.



[Kontakti](#)





## KONTAKTI

### Nosilac projekta:



#### Asocijacija agencija lokalne demokratije

Adresa: c/o Council of Europe 67075 Strasbourg, France

Tel: +33 390 214 593; Fax: +33 390 215 517

E-mail: [antonella.valmorbida@aldaintranet.org](mailto:antonella.valmorbida@aldaintranet.org)

[www.alda-europe.eu](http://www.alda-europe.eu)

### Partneri:



#### Agencija lokalne demokratije Mostar

[www.ldamostar.org](http://www.ldamostar.org), E-mail: [ldamostar@aldaintranet.org](mailto:ldamostar@aldaintranet.org)



forum građana tuzle

#### Forum građana Tuzle

[www.forumtz.com](http://www.forumtz.com), E-mail: [fgt-urbana@forumtz.com](mailto:fgt-urbana@forumtz.com)



#### Udruženje građana

“Demokratija—Obrazovanje—Napredak—DON” Prijedor

[www.donprijedor.com](http://www.donprijedor.com), E-mail: [info@donprijedor.org](mailto:info@donprijedor.org)

#### CLR Breza

Udruženje građana “Centar za lokalni razvoj” Breza

E-mail: [clrbreza@gmail.com](mailto:clrbreza@gmail.com)



Udruženje građana “Demokratski centar Nove nade” Bihać

E-mail: [dcnbi@bih.net.ba](mailto:dcnbi@bih.net.ba)



#### Agencija lokalne demokratije Zavidovici

[www.lda-zavidovici.it](http://www.lda-zavidovici.it), E-mail: [ldazavidovici@aldaintranet.org](mailto:ldazavidovici@aldaintranet.org)



#### Agencija lokalne demokratije Subotica

[www.lda-subotica.org](http://www.lda-subotica.org), E-mail: [ldasubotica@aldaintranet.org](mailto:ldasubotica@aldaintranet.org)



#### Agencija lokalne demokratije Osijek

[www.lda-osijek.hr](http://www.lda-osijek.hr), E-mail: [ldaosijek@aldaintranet.org](mailto:ldaosijek@aldaintranet.org)

### DELEGACIJA EVROPSKE UNIJE U BOSNI I HERCEGOVINI

Skenderija 3A, 71000 Sarajevo

Tel: +387 33 254 700; Fax: +387 33 215 292

[www.delbih.ec.europa.eu](http://www.delbih.ec.europa.eu)



Projekat podržava  
Evropska unija



Ova publikacija je urađena uz pomoć Evropske unije. Sadržaj publikacije je isključiva odgovornost Asocijacije agencija lokalne demokratije—ALDA, i ni u kom slučaju ne predstavlja stanovišta Evropske unije.

Ako ne želite više da primete naš newsletter, molimo da [kliknete ovdje](#)  
Imate pitanje ili komentar? Pišite nam na: [fgt-urbana@forumtz.com](mailto:fgt-urbana@forumtz.com)



Civil Society In Action For  
Dialogue And Partnerships